



JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIÁL

## ***Komunikadu Imprensa***

24 Juñu 2013

### **Tribunál suspende pena prizaun ba arguidu kazu violénsia doméstika**

Iha 20 Juñu 2013, Tribunál Distritál Dili kondena arguidu ho inisiál FAdSL ho pena prizaun fulan 8 maibé suspende tiha ba tinan 1. Antes ne'e, Ministériu Públiku husu tribunál atu kondena arguidu ho pena tinan 1 prizaun maibé suspende ba tinan 3.

*“JSMP enkoraja tribunál atu kontinua kondena arguidu sira ne'ebé komete krime ho natureza violénsia doméstika ho pena ne'ebé todan tanba violénsia doméstika hanesan krime ne'ebé aas iha Timór-Leste,”* dehan Luis de Oliveira Sampaio, Diretór Ezekutivu JSMP.

Ministériu Públiku akuza katak iha 28 Maiu 2012, maiz ou menus tuku 22:00 kalan, arguidu tuku dala 1 iha vítima nia kalilin okos, no dala ida iha kanuruk. Vítima sofre bubu no halo tratamentu iha Óspital Nasionál Guido Valadares. Motivu husi akontesimentu kazu ida ne'e tanba arguidu fila ba uma no vítima la-iha uma.

Ministériu Públiku akuza arguidu bazeia ba artigu 145 Kódigu Penál kona-ba ofensa ba integridade fizika simples konjugadu ho artigu 35 Lei Kontra Violénsia Doméstika.

Iha tribunál nia oin, arguidu konfesa faktus hotu no reforsa liu tan husi vítima. Mesmu nune'e, arguidu hato'ó ba tribunál katak sira dame malu ona no moris hamutuk hanesan feen-laen, no la halo tan krime hasoru vítima no arepende ninia hahalok.

Kazu ne'e dirije husi Juis Dr. Duarte Tilman, Ministériu Públiku representa husi Dra. Lidia Soares (prokuradora estájiada) no arguidu akompaña husi Dr. Jóse da Silva husi Defensória Públiku.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883|77295795 Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl